

# 1 & 2 Samuel

Nos ta bandoná un buki sumamente bunita pa konsentrá riba un buki sumamente interesante. Kisas no tin ningun buki den Beibel ku ta kapta i mantené nos interes dor di henter e buki manera e buki di 1 Samuel

## I. NÒMBER DI E BUKI

Ûn Samuel ta introdusí nos na tres set di buki dòbel—1 i 2 Samuel, 1 i 2 Reinan, 1 i 2 Krónikonan. E seis buki aki ta konta di e establesementu i kaída di e monarkia di Israel.

Den su forma original, 1 i 2 Samuel tabata ún solo buki (meskos ku 1 i 2 Reinan i 1 i 2 Krónikanan). No tabatin un pouza meimei di 1 Samuel i 2 Samuel. Un eskriba antiugo a nota ku e buki ta kontené 1506 versíkulo i a kalkulá ku 1 Samuel 28:24 ta e versíkulo nèt meimei di e buki. Kon biní nan a bira dos buki awor?

Den tempu antiguo, no tabatin buki. Un ròl grandi, manera e ròl di Samuel, ta muchu grandí pa karga ku fasilidat. El a wòrdu partí na dos den síglo tres B.C. ora Tèstamènt Bieu a wòrdu tradusi na griego (LXX). E teksto griego a tuma mucha mas espasio ku e teksto hebreo (griego tin klinker, hebreo antiguo no tin). E traduktornan hudiu di Alexandria a konsiderá tantu e bukinan di Samuel i di Reinan komo bukinan di “Reinonan” (plural, referiendo na e reinonan di Israel i Juda). Pues, nan a konsiderá Samuel i Reinan, kuater buki di “Reinonan” (Awendia ainda iglesia ortodòks ta konsiderá Samuel 1 i 2 Reinonan i Reinan nan ta konsiderá 3 i 4 Reinonan.)

Jerome a tradusí Tèstamènt Bieu na latin. El a yama e kuater buki ei e kuater buki di Reinan (no reinonan). “Reinan” a kuadra mas ku e título na hebreo. Ku tempu, e promé dos buki a haña nòmber di Samuel—1 i 2 Samuel.

Na aña 1448, Daniel Bòmber, tabata e promé persona ku a dividí e bukinan di Samuel i Reinan na dos sekshon den Beibel hebreo. Esaki a wòrdu imprimí na aña 1516-17. Desde e tempu ei, nan a keda asina.

Dikon 1 i 2 Samuel ta karga nòmber di Samuel? Klaramente Samuel tabata e persona prominente den e promé 15 kapitulo di 1 Samuel. E tabata e último hues di Israel. Samuel a ungi e dos rei di kua e bukinan aki ta konta. El a ungi e promé rei di Israel, i e di dos rei ku a bira e rei prominente di Israel.

## II. FECHA DI E BUKI

Atrobe, nos no por bisa eksaktamente ki fecha e buki di Samuel a wòrdu skirbí. Ma e buki ta duna sierto indikashon.

Maske 1 i 2 Samuel no ta mensioná morto di David, e ta duna impreshon ku David a muri. Dos Samuel 23:1 ta mensioná “*e último palabranan di David*”, dunando impreshon ku su morto a sigui poko despues. Pues, e buki lo a wòrdu skirbí despues di David su morto.

Ta parse tambe ku e buki lo a wòrdu skirbi despues di morto di Salomon. Segun 1 Samuel 27:6, “*Ziklag ta pertenesé na e reinan di Juda te dia djawe*”. E implikashon ta ku e

kiebro entre Israel i Juda a tuma lugá kaba. E kiebro ei no ta tuma lugá te reinado di Roboam (1 Reinan 12).

E bukinan no ta menshoná Samaria, ni Asiria su konkísta di Samaria. Talbes esei ta duna impreshon ku e buki a wòrdu skirbí promé ku Samaria a bira kapital di Israel, e nashon di nort.

Talbes nos por bisa ku basta konfiansa ku e buki a wòrdu skirbí entre 930 i 722 B.C. Ta mas probabel ku e fecha mas antiguo (930 B.C.) ta mas serka e fecha korekto.

### III. OUTOR DI E BUKI

Probabelmente e buki ta karga nòmber di Samuel pasobra, segun Talmud, Samuel tabata outor di e promé 24 kapítulo di 1 Samuel i sobrá di 1 i 2 Samuel tabata skirbí pa Natan i Gad. (Ún Samuel 25:1 ta konta di morto di Samuel.) Probabelmente nan a yega na e konklushon ei for di 1 Krónikanan 29:29: *“Awor e echonan di rei David, for di promé te na último, ta pará skirbí den e krónikanan di Samuel, e miradó, den e krónikanan di Natan, e profeta, i den e krónikanan di Gad, e miradó...”* Pusíbelmente e teksto aki ta referi na 1 i 2 Samuel. Ma tambe ta pusíbel ku e ta referí na otro bukinan.

Ma e buki di 1 i 2 Samuel ta duna impreshon ku el a wòrdu skirbí pa solamente ún outor. Ken anto tabata outor? Sin duda Natan lo tabata sa bon loke a sosodé durante reinado di rei David. Segun 1 Samuel 22:5, e profeta Gad tabata huntu ku David durante su huída di Saul. E lo por tabata bon informá di loke a sosodé durante e tempunan ei. Otronan ta surgerí ku e saserdote Ahimaas por a skirbi e buki. Talbes un di nan por a skirbi e buki. E mihó kontesta pa e pregunta “ken outor di e buki tabata?” ta simpelmente, “nos no sa.”

Di tur manera, ta parse ku e outor a hasi uso di e informashon di e bukinan di e tres outor aki huntu ku otro buki (p.e. Buki di Jaser - 2 Samuel 1:18) pa forma e relato den 1 i 2 Samuel. Talbes e tambe a hasi uso di relatonan i rekòrtnan den arkivo: 1 Samuel 14:47-52; 2 Samuel 3:2-5; 5:13-14; 8:15-18; 20:23-26; 23:8-19; 24:5-9.

### IV. TEKSTO DI E BUKI

Pa un motibu deskonosí, e teksto di 1 i 2 Samuel ta esun ménos bon preservá ku tur otro buki di Beibel. Por ehèmpel, 1 Samuel 13:1 no tin e number dilanti e palabra “*aña*” den e teksto, lagando e lektor ku e pregunta kunatu *aña*?

Segun Gleason Archer, kisas e teksto antiguo di kua e eskriba a kopia tabata dañá dor di uso òf pasobra bichi a kuminsá kom’*é*. E tradukshon griegu di Tèstamènt Bieu (LXX) ta yuda hopi pa saka afó e palabranan deskonosí. (E teksto griegu sinembargu di 1 Samuel 13:1 no ta yuda determiná kuantu *aña*.)

### V. PROPOSITO DI E BUKI

Un proposito sigur ta pa presentá un historia di e eventonan relashoná ku e establesementu di un monarkia na Israel. Ún Samuel espesialmente ta e buki di transishon for di teokrasia pa monarkia. E buki ta papia di e último dos hues i e promé dos rei den e era di transishon. E ta papia di Elí, karera di Samuel, esun ku a ungi e reinan, karera di Saul, e rei ku a fracasá, i karera di David, esun ku a establese e dinastia for di kua e Mesias lo bin. E proposito aki por ta bisá na un otro manera: Pa konta e historia di e transishon di teokrasia pa monarkia. E tres hòmer prominente den e buki ta Samuel (e último hues), Saul (e promé rei), i David (e rei mas prominente).

Dios a yama Israel pa ta un nashon úniko. E mes lo ta e Rei invisíbel. Ma e pueblo di Israel a rebeldiá. Nan tabata ke un rei humano i visíbel manera e otro nashonnan. Israel a rechasá lo mihó (Dios Su boluntat) preferando algo inferior. Nan a kere ku esaki lo solushoná nan problemanan. Ma dor di skohe e ruta mas fásil, nan a enkontrá problemanan nobo.

Nos por siña un lès for di esei. E ruta mas fásil no nesesariamente ta e ruta mas mihó tur ora. Nos mester buska Señor Su kara den kada sirkunstansia pa sa e ruta ku E ke pa nos kamna.

Proverbionan 3:5-6 ta bis' é bon, *“Konfia den SEÑOR ku henter bo kurason, i no dependé riba bo mes komprendementu. Den tur bo kamindanan rekonos'E, i E lo dirigí bo berehanan.”*

Un otro pusíbel proposito ku e buki a wòrdu skirbí tabata pa presentá un apologétika pa e dinastia di David. Kisas tabatin israelita (talbes bibando durante reinado di Salomon) ku a haña ku e dinastia di David ta ilehitimo. Tin bon pusibilidat ku 1 Samuel 15 - 2 Samuel 8 a wòrdu skirbí pa mustra ku Saul a fracasá, ku Dios a skohe David, i ku David tabatin e derechu pa reina, siguiú pa su yunan.

Talbes tin un proposito praktiko pa e buki. E buki di Samuel klaramente ta mustra ku piká tin konsekuensianan. Maske Dios a skohe Saul, El a pon' é un banda pa motibu di su rebeldia. Maske David tabata “un hòmbler konforme kurason di Dios”, tòg el a kosechá konsekuensianan severo pa kousa di su piká

Ademas, sin e buki aki, nos lo no sa e trasfondo di diferente Salmo. Tambe tin sierto echu tokante Yerusalem ku nos lo no komprendé si nos no tabatin 2 Samuel.

## **VI. “PROBLEMANAN” DI E BUKI**

Tin diferente “problema” den e buki ku lo ta bon pa nos nota. Algun ta problema ku nos mester pahende ku ta imaginá diferente problema den e buki di Samuel. Aglun lo ta bon pa nos klaria:

### **A. NA KUA TRIBU SAMUEL A PERTENESÉ?**

Ún Samuel 1:1 ta bisa *“un sierto hòmbler di Ramataim-zofim di a serunan di Efrain, i su nòmber tabata Elkana... un efrateo”*. En kotnraste, 1 Krónikanan 6:27-28 ta inkluí Samuel su nòmber den lista di tribu di levitanan.

Ta notabel ku 1 Samuel 1:1 no ta bisa ku Elkana tabata di e tribu di Efrain. Di bèrdat, 1:1 solamente ta duna su adrès. Nos tin ku kòrda ku levitanan no a haña un teritorio grandi komo erensia. Na lugá di esei, nan a haña 48 siudat pa nan biba den entre e diesdos tribu di Israel (Numbernan 35:6; Josué 21). Ramataim-Zofim por tabata un di e statnan di e levitanan. Samuel su mayornan tabata levitanan ku a biba den e tribu di Efrain. Pues Samuel tabata un levita tambe.

### **B. SAUL TA BIRA REI DOS BIAHA**

Segun 1 Samuel 10:20-27 Saul a wòrdu skohí pa medio di lòt i a wòrdu presentá na pueblo di Israel. Ma algun no tabata ke rekonosé komo rei (10:27). Saul a bai su kas despues di esaki.

Despues di su triúnfo riba e amonitanan, ta parse ku atrobe Samuel a hasi Saul rei den 1 Samuel 1:14-15. Ma esaki tabata pa *“renoba e reino”* (11:14)—pues, rekonfirmá loke a wòrdu konfirmá ya kaba.

### **C. DAVID TA WÒRDU INTRODUSÍ NA SAUL DOS BIAHA**

Den 1 Samuel 16:14-23, David a bin den empléu di Saul komo su músiko i kargadó di arma. Despues ku David a mata Goliat, Saul ta hasi pregunta *“Ta ken su yu e hoben aki ta?”* (17:55-58) komo sifuera e no konosé. Ma klaramente Saul sigur tabata sa nòmber di David. Echu ta ku Saul a primintí esun ku mata Goliat, ku e lo *“hasi e kas di su tata liber den Israel”* (17:25). Den otro palabra, nan lo no mester paga belasting mas. Ripará ku Saul ke sa ken tata di David ta (17:55,56,58).

### **D. KEN A MATA GOLIAT?**

Nos tur sa e storia kon David a mata Goliat (1 Samuel 17). Ma 2 Samuel 21:19 ta bisa ku ta *“Elhanan, yu hòmbler di Jaare-oregim e bêtlehemita a mata Goliat e geteo, kende su kabu di lansa tabata manera e balki di un wefdó-di-tela”*.

Ta parse ku 1 Krónikanan 20:5 ta soluashoná e problema. E ta bisa, “...*Elhana, yu hòmbèr di Jair, a mata Lahmi, ruman hòmbèr di Goliat e geteo, ken su kabo di lansá tabata manera balki di un wefdó-di-tela.*” Ta parse ku e teksto di Samuel tabatin defekto den e versíkulo ei, ku e lèternan hebreo ta similar i pesei Bètlehèm a wòrdu skirbi na lugá di Lahmi. Dos versíkulo despues di 2 Samuel 21:19 ta laga sa ku David a mata sikiera ún di e kuater gigante (21:22).

## **E. DOS BIAHA E ZIFEONAN TA REDA DAVID**

Tantu den 1 Samuel 23 komo den kapítulo 26, e zifeonan ta laga Saul sa unda David ta skonde. Algun teólogo ta pretendé ku e teksto ta ripití e mesun evento. Ma e eventonan ku ta sigui klaramente ta totalmente diferente, demonstrando ku nan ta dos evento distinto.

## **F. E MONTADÓ DI ENDOR**

Maske Saul a purba likidá bruheria for di Israel konforme Palabra di Dios (Levítico 20:6,27; Deuteronomio 18:9-13), tòg e no a logra kompletamente. Ora e tabata desesperá pa sa su destino, e mes a konsultá ku un montadó, pa e por papia ku e profeta defunto Samuel. Algun estudiante di Beibel ta kere ku Samuel no a aparesé, ku Saul solamente a imaginá esei. Ma e teksto ta indiká ku ta mas probabel ku Samuel mes a aparesé na un forma visíbel.

Montadónan por tin hopi poder; poder diabóliko. Ma ora nan ta pidi pa sierto defunto aparesé, normal ta demonionan ku ta hasi nan mes parse i papia manera e defunto. Nan no tin e poder pa resusitá un persona temporalmente.

Den e kaso aki ta parse ku Dios a intervení na un forma spesial. Samuel mes a aparesé. E montadó mes a spanta; e no a antisipá loke a sosodé (28:12). Normal e no por a hasi loke a sosodé e dia ei.

## **VII. ERA DI E BUKI**

Despues di e konkísta di Kanaan dor di Josué, e pueblo di Israel a pasa den tur klase di problema. Hopi di e problemanan tabata kousá dor di nan rebeldia moral i spiritual. E buki di Huesnan ta demonstrá esei bon kla.

Na final di tres síglo e huesnan, e situashon tabata insoportabel. Anarkia tabata manda: “*kada ken tabata hasi loke tabata bon den su mes bista*” (17:6; 21:25). E huesnan—personanan empoderá pa Dios—a laga hopi di deseá. Pueblo di Israel a sklama pa kambio. E nashonnan rònt di Israel tabatin reinan. Israelitanan a bira desesperá pa un rei tambe.

Samson, e último hues den buki di Huesnan, no tabata e último hues. E saserdote Elí i e profeta Samuel tambe tabata hues (1 Samuel 4:18; 7:6,15,17).

E eventonan deskribí den e bukinan di 1 i 2 Samuel lo a tuma lugá entre 1080 (pusíbel fecha ku Samuel a nase) i 970 B.C. (fecha ku David a fayesé).

Ta un yudansa tambe pa nos komprendé e situashon polítiko rònt di Israel durante e tempu ei. Un faktor importante pa kòrda ta ku Israel tabata situá meimei di e dos pais mas poderoso di e era ei: Egipto i Mesopotamia.

Ma durante e periodo di tempu aki, Egipto tabata hopi debil. Despues di Ramses III (1198-1167), e poder di e Faraonan a wòrdu debilitá poko poko dor di poder di e famia saserdotal na Egipto. Porfin na aña 1085 B.C., e sumosaserdote, Heri-Hor, tabata manda na Karnak mientras prensnan a kontrolá Tanis. No tabata te 927 B.C. ku Egipto a rekuperá basta pa invadí e tera ku Dios a duna Israel (durante reinado di Roboam).

Na Tiglat-pileser I (1113-1074 B.C.) rei di Asiria (lokalisá na Mesopotamia), a ekstendé su influencia wèst, te Siria i Fenisia. Pero duranto reinado di Asur-rabi II (1012-975), tribunan di Aram a menasá e statnan banda di riu Eufrates. No tabata te 875 B.C. ku Asiria a logra tuma suficiente kontrol pa nan por sigui nan konkistanan.

Pues, e dos nashonnan mas poderoso di mundu no tabata un menasa pa Israel durante e era aki. E menasa mas grandi pa Israel a bin for di e filisteonan. Nan a purba habitá a kostanan

di Egipto ma a wòrdu derotá. Pesei nan a purba habitá e territorio di Israel, kuminsando mas òf ménos na aña 1200 B.C. Durante tempu di Samson, Eli, Samuel, i Saul, e filisteonan tabata un menasa sumamente serio. Kasi nan a logra destruí e nashon di Israel.

Un motibu ku nan tabata un menasa tantu serio pa Israel tabata pasobra nan tabata as kon pa smèlt heru. Promé ku 1200 B.C., e heteonan tabata hasi esaki. Ma nan a biba leu di Israel. E filisteonan tabata un pueblo ku a muda, i a bin ku nan konosementu na frontera di Israel. Ún Samuel 13:19-22 ta mostra kon serio e sititashon tabata. No tabata te tempu ku David a reina ku el a logra mansa e filisteonan. Despues di esei, nunca mas nan tabata un menasa serio pa Israel.

Talbes lo ta bon pa mensioná algun otro nashon—ménos prominente—ku ta bin dilanti den e e bukinan di Samuel.

Saul a bringa kontra e edomitanan (1 Samuel 14:47) ma tabata David ku a konkistá nan i a pone fortinan den nan pais (2 Samuel 8:14). E konkista di Edom tabata importante pasobra David a haña koper i heru for di e minanan di Edom. Ku esakinan, Israel a logra kibra “wesu di lomba” di e filisteonan den nan produkshon di armanan.

E amalekitanan a biba sùit di Edom i Israel. Saul a purba destruí nan, ma no a kompletá su tarea (1 Samuel 15). Fuera di e atake di e amalekitanan kontra Ziklag, nan no ta bin dilanti masha hopi den e buki.

Aram tabata un nashon forma di diferente estado, por ehèmpel Haaka, Geour, Tob, Soba, èts. Den Beibel nan ta yamá Sirionan (2 Samuel 8:3-7). Nan tabata un nashon hopi fuerte den e era aki.

Saul a derotá Moab (1 Samuel 14:47) i David tambe a konkistá nan (2 Samuel 8:2). Pa dos síglo nan a sirbi Israel.

Tantu Saul (1 Samuel 11:1-11) komo David (2 Samuel 10) a derotá Amon. David a konkistá nan kapital (2 Samuel 12:27). Despues di e derotanan ei, nunca mas Amon tabata un menasa pa Israel.

E pais di Fenisia tabata mas interesá den komersio i nabegamentu na lugá di konkista. David a hañ' é bentahoso pa mantené un bon relashon ku Fenisia.

Nos por komprendé kon Israel por a yega na su era mas glorioso durante reinado di David den e periodo aki. E nashonnan mas poderoso i grandi di e era ei tabata debil. Huntu ku esei, Saul i David a logra konkistá e nashonnan rònt Israel.

## VIII. STRUKTURA I KONTENIDO DI E BUKI

Nos lo presentá dos diferente skema:

- I. SAMUEL: E ÚLTIMO DI E HUESNAN – 1 SAMUEL 1-7
  - A. Su Nasementu i Su Hubentut – 1-2
  - B. Su Yamada i Su Servisio - 3
  - C. Su Era i Su Echunan - 4-7Resúmen – 7:15-17
- II. SAUL: B PROMÉ DI E REINAN – 1 SAMUEL 8-15
  - A. Su Apuntashon komo Rei - 8-10
  - B. Su Komienso Eksitoso – 11-12
  - C. Su Bobedat i Piká Despues - 13-15Rechaso - 15:23,28,35
- III. DAVID: E SUSESOR UNGI – 1 SAMUEL 16-31
  - A. Su Ungimentu pa Samuel - 16:1-13
  - B. Su Servisio pa ku Saul - 16:14-20:42
  - C. Su Añanan komo Fugitivo - 21-30Morto di Saul – 31

- I. DAVID SU TRIUNFONAN – 2 SAMUEL 1-12
  - A. Rei di Juda so, na Hebron - 1-4
  - B. Rei di Henter Israel, na Yerusalem - 5-12
- II. DAVID SU PROBLEMANAN – 2 SAMUEL 13-24
  - A. David Su Problemanan Familiar - 13-18
  - B. David Su Problemanan Nashonal - 19-24
  
- I. PREPARASHON PA MONARKIA NA ISRAEL – 1:1 – 7:17
  - A. Niñes di Samuel – 1:1 – 4:1a
  - B. Relatonan tokante e arka – 4:1b – 7:17
- II. KOMIENSO DI MONARKIA NA ISRAEL – 8:1 – 15:35
  - A. Subida di Saul – 8:1 – 12:25
  - B. Bahada di Saul – 13:1 – 15:35
- III. ESTABLESEMENTU DI MONARKIA NA ISRAEL – 16:1 – 31:13
  - A. Preparashon di David pa reinado – 16:1 28:2
  - B. Final di reinado di Saul – 28:3 – 31:13
- IV. KONSOLIDASHON DI MONARKIA NA ISRAEL – 1:1 – 20:26
  - A. Komienso di David su reinado na Juda – 1:1 – 3:5
  - B. Komeinso di David su reinado na Israel - 3:6 – 5:16
  - C. David su reino poderoso – 5:17 – 8:18
  - D. Historia di David su reinado – 9:1 – 20:26
- Epílogo – 21:1 – 24:25

Klaramente 1 Samuel ta papia di tres persona. Den kapítulonon 1-7, Samuel ta esun ku ta destaká. E siguiente ocho kapítulo ta konsentrá riba Saul, i Samuel no ta tan prominente. Den kapítulonon 16 te 31, maske Saul ta rei, klaramente David ta esun ku ta sobresalí.

Ta masha visto tambe ku 2 Samuel ta formá di dos divishon. Kapítulo 11—e kapítulo ku ta konta di David su piká ku Bètsabé i matamentu di su esposo—ta parti nan for di otro. Promé ku kapítulo 11 por nota triúnfonon so. Depues di kapítulo 11, problema so ta bin dilanti. Tin un mensahe kla den esaki: triúnfo ta bira tròbel dor di piká.

Ripará tambe un otro formashon di 2 Samuel. Dos Samuel 1-20 ta demonstrá un komposishon maestral di kuater parti ku no por a sosodé pa kasualidat. E promé sekshon (1:1 - 3:5) ta trata ku komienso di David su reinado riba Juda i ta klousurá ku kuater versíkulo ku ta lista nòmbernan di su yunan ku a nase na Hebron (3:2-5). E di dos sekshon (3:6 – 5:16) ta tokante inisio di David su reinado riba henter Israel, i ta finalisá ku kuater versíkulo listando su yunan ku a nase na Yerusalem (5:13-16). E di tres divishon (5:17 – 8:18) ta tokante David su reinado poderoso. E sekshon aki tambe ta kaba ku kuater versíkulo ku ta lista su ofisialnan (8:15-18). I ta méskos ku e último parti (9:1 – 20:26), ku ta trata ku historia di su reinado. E sekshon aki ta klousurá ku kuater versíkulo tokante David su ofisialnan (20:23-26). Por konsiderá final di e buki e epílogo.

No ta pa kasualidat ku henter e buki di Samuel ta kuminsá ku Kantika di Ana (1 Samuel 2:1-11) i ta terminá ku Kantika di David (2 Samuel 22). Esaki ta un demonstrashon ku originalmente e dos buki tabata ún solo buki.

## IX. OPSERVASHONAN DI E BUKI

Un lema ku ta keda ripití den 1 i 2 Samuel ta “*SEÑOR Su ungi*” (1 Samuel 16:3,6,12-13; 24:6; 26:9,11,16,23; 2 Samuel 1:14,16; 3:39; 19:21). E palabra “Mesias” ta nifiká “esun ungi”. Den un sintido, ku e énfasis riba Dios Su ungi den e bukinan di Samuel, e ta antisipá esun ku lo bin komo Mesias. Saul, esun ungi, tabata un frakaso. Esun siguiente persona ungi, David, tambe a laga di deseá. E frakasonan di e reinan ku a siguié a pone David den un lus mas favorabel, te

ku Israel a antisipá e binida di Esun ungi perfekto, e Mesias. Beibel ta mostra kla ku Hesus ta desendiente di rei David (Mateo 1:1,6,17), ta Esun ungi primintí, e Mesias antisipá.

## **A. BUNITESA DI E BUKI**

Ta interesante tambe pa nota e progreso den dos tópiko di suma importansia den e buki di Samuel. Mirando e esena polítiko, na komienso di e buki, Israel a konsistí di diesdos tribu desorganisá bibando bou di e menasa serio di e filisteonan. Na final di e buki, Israel bou guia di David a bira e nashon mas poderoso den e region. Riba e pantaya religioso, por nota un kambio grandí tambe. Na komienso di e buki, Israel ta adorá na un sitio i ta bou guia di saserdotenan korupto i immoral. Ma ora e lektor ta yega na final di e buki, David a kumpra un sitio na Yerusalèm pa konstruí e tèmpep.

## **B. DIOS SU SOBERANIA DEN E BUKI**

Dios Su soberania ta obvio den kambionan dramátiko ku ta tuma lugá den e buki. E kantika di Ana ta introdusí e tópiko aki: “*SEÑOR ta mata i ta duna bida...SEÑOR ta hasi pober i ta hasi riku; E ta rebahá, tambe E ta hals. E ta lanta e pober for di den stòf, E ta hisa esun den nesidad for di e monton di shinishi, pa pone nan sinta huntu ku e nobelnan i eredá un puesto di onor*” (1 Samuel 2:6-8).

Por nota e mesun patronchi aki dor di e buki: un muhé steril ta bira mama di seis yu (1:5-6; 2:12-16); Eli su yunan ta muri ku berguensa (4:1); un buskadó di buriku i un wardadó di karné ta ungi komo rei (9:2-3; 16:1). Dios ta kita Saul for di ta rei i ta remplas’é ku David (1 Samuel 16:13-14). Natan, e profeta di Dios, ta reprenyé David, un rei poderoso (2 Samuel 12:9-10).

## **C. PROFETANAN I REINAN**

Méskos ku Moises den Deuteronomio a duna di konosé ku Israel lo pidi un rei (17:14-20), di mésun manera el a pronostiká ku lo tin profeta (18:15-18). Maske tabatin algun profeta promé ku e era aki (Moises mes tabata un profeta segun Deuteronomio 18:18), nan tabata hopi skars. Por bisa ku inisio di e puesto di rei tambe a introdusí era di profetanan. Diferente teksto ta duna impreshon ku Samuel a inisiá e era di profetanan (Echunan 3:24; 13:20; Hebreonan 1:32). Saul, e promé rei di Israel, tabata ungi pa Samuel, esun ku a enkabesá e profetanan. Maske reinan a sinta riba trono, nan mester someté na bos di Señor, deklará pa medio di profetanan (1 Samuel 13:13; 15:22-23; 2 Samuel 12:7-14). Te final di e monarkia di Israel, profetanan a kontinuá ku e tarea aki.

## **D. DOKTRINA DI PIKÁ DEN E BUKI**

Ún i dos Samuel ta revelá e piká di kurason di hende i e konsekuensianan di piká. E buki ta mostra kla ku asta “bon hende” ta hasi piká. Lídernan, manera Saul, David, Elí, i asta Samuel a faya pa ku Dios.

Saul a kuminsá bon, ku un aktitut umilde, kontrolá pa Spiritu Santu. Ma ku tempu, el a kuminsá desobedesé Dios i a bin bou influensia di un spiritu malu, ku yalusí i odio. Nèt promé ku el a muri den bataya, el a tuma kontakto ku un motadó.

Elí tabata e sumosaserdote. Ma e tabata un frakaso komo un tata. Su yunan, siendo saserdotenan, no a buska kara di Dios, a hòrta di sakrifisionan, a kometé aktonan immoral (1 Samuel 2:12-17,22; 3:13).

Beibel ta bisa bon kla ku Samuel su yunan “*no a kana den su pasonan, ma a desviá bai tras di ganashi desonesto i a tuma plaka pasá bou di mes i a pèrvèrti hustisia*” (1 Samuel 8:3). Pa e motibu ei, pueblo di Israel tabata mas motivá pa pidi pa un rei (8:5).

David ta esun ku ta destaká den e buki. Siendo un hòmber conforme e kurason di Dios tòg el a kometé adulterio i a asesiná esposo di Bètsabé (2 Samuel 11). David a atmití su piká (2 Samuel 12:13) i Dios a pordon’é. Ma el a sufri konsekuensianan serio di su piká. E yu ku Bètsabé a fayesé. David su yu mayó, Amnon, a violá su ruman, Tamar. Ruman di Tamar, Absalon, a mata Amnon i despues a inisiá un rebelion kontra David.

Un otro punto interesante relashoná ku piká den e buki aki ta pa kompará piká di Saul ku piká di David. Saul a hasi piká i Dios a kastig'é dor di kit'é for di ta rei, prevenié di establese un dinastia, i porfin a kita su bida. David a hasi piká i tòg e ta yamá “*un hòmbler konforme mi kurason*” (1 Samuel 13:14; Echunan 13:22). Saul su piká tabata tantu mas grandi ku e piká di David? Apsolutamente nò! Ma maske hende a mira e estatura di Saul i ningun persona por a kompará kun'é (1 Samuel 10:24), Dios a mira su kurason. Mientras Saul a kobardiá, David a bai bring kontra Goliat kasi sin arma. David no tabata sin piká den su bida. Ma el a repentí. I Dios a mira ku David tabatin un set pa Señor ku Saul no tabatin.

### **E. E ALIANSA DI DIOS KU DAVID**

Un di e aliansanan mas importante di Tèstament Bieu por wòrdu hañá den 2 Samuel 7. E aliansa aki ta amplia riba Dios Su aliansa ku Abraham. Dios a primintí ku David lo ta tata di un disnastia etèrno. Un desendiente lo sinta riba trono di David pa semper. David su último palabranan asta ta menshoná Dios Su “*alianza etèrno*” ku David (2 Samuel 23:5). Nos sa awor ku e Desendiente ei ta nos Señor Hesu-Kristo!

## **Literatura Konsultá**

- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 311-317.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 2, p. 43-82.
- Demaray, Donald E. *A Layman's Guide to Our Bible* (Los Angeles: Cowman Publishing Company, 1964), p. 77-80.
- Dillard, Raymond B. & Logman III, Tremper. *An Introduction to the Old Testament* (Grand Rapids: Zondervan Publishing House, 1994), p. 135-147.
- Wolf, H. Tenney, Merrill C. ed. *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 5, p. 254-264.
- Youngblood, Ronald F. Gaebelein, Frank E. ed. *The Expositor's Bible Commentary*: (Grand Rapids: Zondervan Publishing House, 1988), vol. 3, p. 551-568.